



17. nóvember 2020

Efni: Umsögn Hagsmunasamtaka heimilanna um mál nr. S-239/2020 í samráðsgátt stjórnvalda

*Drög að frumvarpi um breytingu á ýmsum lögum um skatta og gjöld
(skattalegir hvatar fyrir lögaðila sem starfa til almannaheilla)*

Hagsmunasamtök heimilanna eru almenn félagasamtök sem starfa í þágu almannaheilla með áherslu á neytendavernd á fjármálamarkaði og rétt heimila til viðunandi lífsviðurværis. Samtökin eru almennt hlynnt áformum um að veita samtökum sem starfa í þágu almannaheilla ívilnanir og skapa hvata fyrir einstaklinga og lögaðila til að styrkja slíka starfsemi með fjárframlögum.

Með vísan til þessa hlutverks samtakanna mótmæla þau harðlega þeirri skilgreiningu á starfsemi til almannaheilla sem kemur fram með tæmandi talningu í 1. gr. ofangreindra frumvarpsdraga. Þar eru taldar upp ýmsar tegundir samtaka sem mörg starfa tvímælalaust í þágu almannaheilla, ásamt öðrum sem er í besta falli umdeilanlegt hvort geri það í raun. Sem dæmi um það eru öll geryðingarvopn afrakstur vísindalegrar rannsóknarstarfsemi af einhverju tagi. Á hinn bóginn eru þar hvergi tilgreind samtök sem beita sér fyrir borgaralegum réttindum s.s. neytendasamtök.

Umrædd skilgreining er í ósamræmi við frumvarp ferðamála-, iðnaðar- og nýsköpunarráðherra um félög til almannaheilla (þskj. 182 - 150. löggj.) en gildissvið þess er skilgreint þannig í 1. gr. að það nái til allra félaga sem séu starfrækt í þeim tilgangi að efla afmörkuð málefni til almannaheilla samkvæmt samþykktum sínum og skráð sem slík hjá fyrirtækjaskrá. Fram kemur í greinargerð með frumvarpinu að þessi skilgreining eigi meðal annars við um "neytendafélög".

Samtökin mælast eindregið til þess að þau frumvarpsdrög sem eru hér til umsagnar verði tekin til endurskoðunar með tilliti til þess að samræma þau við drög sem þegar hafa verið lögð á vettvangi Atvinnuvega- og nýsköpunarráðuneytisins að heildarlöggjöf um félög til almannaheilla. Það er krafa samtakanna að í þessu samhengi nái hvers kyns skattalegar ívilnanir einnig til samtaka sem vinna að eflingu almennra réttinda, svo sem í neytendamálum. Sem dæmi væri auðvelt að bæta við b-lið 1. gr. nýjum staflið svohljóðandi: "samtök í þágu borgaralegra og félagslegra réttinda".

- o -

Virðingarfyllt,
f.h. Hagsmunasamtaka heimilanna,

Ásthildur Lóa Þórsdóttir, formadur@heimilin.is

Guðmundur Ásgeirsson, erindreki@heimilin.is